

四庫全書

史部

# 欽定四庫全書

史部  
七國攷卷三

詳校官編修<sub>臣</sub>裴謙

編修<sub>臣</sub>程嘉謨覆勘

總校官庶吉士<sub>臣</sub>何思鈞

校對官助教<sub>臣</sub>汪錫魁

謄錄監生<sub>臣</sub>吳炳文

欽定四庫全書

七國政卷一

明董說撰

秦食貨

戶籍河渠附

轅田

漢地理志秦孝公用商鞅制轅田開阡陌杜氏通典云  
孝公用商鞅鞅以三晉地狹人負秦地廣人寡故草不  
盡墾地利不盡出於是誘三晉之人利其田宅復三代  
无知兵事務本於内而使秦人應敵於外故廢井田開

阡陌任其所耕不限多少數年之間國富兵強天下無敵吳氏曰井田受之於公毋得鬻賣故王制曰田里不粥秦開阡陌遂得賣買又戰得甲首者益田宅五甲首而隸役五家兼井之患自此始矣民田多者以千畝為畔无復限制王氏曰古者遂廣二尺溝四尺洫八尺澮二尋則丈有六尺矣徑容車馬畛容大車涂容乘車一軌道二軌路三軌則幾二丈矣此其水陸占地不得為田者頗多所以正經界止侵爭時畜洩備水旱為永久

之計今商君除一時之害而千古聖賢傳授精微之旨  
失矣蔡澤稱商君曰決裂阡陌決裂云者井田之制分  
畫堅明封表深固非大用其力以決裂之不能掃滅其  
跡也陸深傳疑錄曰商鞅佐秦以一夫力餘地利不盡  
於是改制二百四十步為畝秦孝十二年  
周顯十九年秦別紀作昭  
襄王四年初為田開阡陌

### 牛田

國策秦以牛田通水糧

墾令

商君開塞耕戰書戰墾令曰無宿治則邪官不及為私  
利於民而百官之情不相稽則農有餘日邪官不及為  
私利於民則農不敝農不敝而有餘日則草必墾矣訾  
粟而稅訾量則上一而民平上一則信信則臣不敢為邪  
民平則慎慎則難變上信而官不敢為邪民慎而難變則  
下不非上中不苦官下不非上中不苦官則壯民疾農  
不變壯民疾農不變則少民學之不休少民學之不休

則草必墾矣無以外權爵任與官則民不貴學問又不  
賤農民不貴學則愚愚則無外交無外交則勉農而不  
偷民不賤農則國安不殆國安不殆勉農而不偷則草  
必墾矣祿厚而稅多食口衆者敗農者也則以其食口  
之數賤而重使之則僻淫游食之民無所於食民無所於食  
則必農農則草必墾矣使商無得糴農無得糴農無得糴  
則竊情之農勉疾商不得糴則多歲不加樂多歲不加樂則  
饑歲无裕利无裕利則商怯商怯則欲農竊情之農勉

疾商欲農則草必墾矣聲服無通於百縣則民行作  
不顧休居不聽休居不聽則氣不淫行作不顧則意必  
一意一而氣不淫則草必墾矣無得取庸則大夫家長  
不見繕愛子惰民不宥而庸民無所於食是必農大夫  
家長不見繕則農事不傷愛子惰民不宥則故田不荒農  
事不傷農民益農則草必墾矣

庸催也閭民催役於人  
也繕治也大夫家長不

得役民  
治事也

廢逆旅則姦偽躁心私交疑農之民不行逆旅  
之民无以食即必農農則草必墾矣壹山澤則惡農慢



情倍欲之民无所於食无所於食則必農農則草必墾  
矣貴酒肉之價重其租令十倍其樸然則商估少農不  
能喜酣輿大臣不能為荒飽商估少則上不貴粟民不  
能喜酣輿則農不慢大臣不荒則國事不稽主无過舉  
上不貴粟民不慢農則草必墾矣重刑而連其罪則褊  
急之民不鬪狠剛之民不訟怠惰之民不游費資之民  
不作巧諛惡心之民无變也五民者不生於境內則草  
必墾矣使民无得擅從則誅愚亂農民无所於食而必農

愚心躁欲之民一意則農民必靜農靜誅愚則草必墾  
矣均出餘子之使令以世使之又高其廨舍令有角官  
食槩不可以辟役而大官未可必得也則餘子不游事人  
則必農農則草必墾矣國之大臣諸大夫博聞辨慧游居  
之事皆无得為无得居游於百縣則農民无所聞變見  
方農民无所聞變見方則知農无從離其故事而愚農  
不知不好學問愚農不知不好學問則務疾農知農不  
離其故事則草必墾矣令軍市無有女子而命其商令

人自拾甲兵使視軍興又使軍市无得私輸糧者則姦  
謀无所於伏盜私糧者不私稽輕愔之民不游軍市盜  
糧者無所售送糧者不私輕愔之民不游軍市則農民  
不淫國粟不勞則草必墾矣百縣之治一形則從迂者不敢  
更其制過而廢者不能匿其舉過舉不匿則官無邪人  
迂者不飾代者不更則官屬少而民不勞官無邪則民  
不教民不教則業不敗官屬少徵不煩民不勞則農多  
日農多日徵不煩業不敗則草必墾矣重關市之賦則

農惡商商有疑憎之心農惡商商疑憎則草必墾矣以  
商之口數使商令之廝輿徒重者必當名則農逸而商  
勞農逸而商勞則良田不荒商勞則去來賁送之禮無  
通於百縣則農民不饑行不飾農不饑行不飾則公作  
必疾而私作不荒則農事必勝農事必勝則草必墾矣今  
送糧无取僦无得反庸車牛輿重設必當名然則往來  
疾則業不敗農業不敗則草必墾矣無得為罪人請於  
吏而饒食之則姦民無主姦民無主則為姦不勉農民

不傷姦民無撲姦民無撲則農民不敗農民不敗則草  
必墾矣

粟

魏文帝典論當七國爭鬪秦粟如山趙若虎

棗栗

韓子秦大饑應侯請發五苑果棗栗以活民詩疏云栗  
五方皆有周秦吳揚特饒唯漁陽范陽栗甜美長味他  
方不及也

載鹽

太平御覽云秦穆公使賈人載鹽

行錢

秦別紀秦惠文王生十九年而立立二年初行錢始皇  
本紀秦始皇九年令國中有生得嫪毐賜錢百萬殺之五  
十萬許氏說文云古者貨貝而寶龜周而有泉至秦廢  
貝行錢

租禾

史記秦簡公七年初租禾

賦稅 口賦

史記秦孝公十四年初為賦董仲舒云秦用商鞅之法  
力役三十倍於古田租口賦鹽鐵之利二十倍於古日  
慎齋記聞云秦商鞅更為稅法收大半之賦三分而稅  
一民力殫矣咸陽大事記云秦賦戶口百姓賀死而吊  
生故秦諺曰渭水不洗口賦起即苛政猛虎之意矣

蠻夷賦

漢舊注云秦惠王以巴氏為蠻夷君長有罪得以爵除其君長歲出賦二千一十六錢三歲一出義賦千八百錢其民戶出帑布八丈二尺雞羽三十鏃杜氏通典云秦昭襄王時巴郡閬中夷廖仲等射殺白虎昭王以其夷人不欲加封乃刻石為盟要復夷人頃田不租十妻不算注云一户免其一頃田之租雖有十妻不輸口算之錢

長太平倉



太平御覽云秦始皇四年七月立長太平倉豐則糴歉則糶以利民也

戶籍

史記秦獻公十年初為戶籍相伍按杜氏通典云周武王致商之罪罔有敵於我師一戎衣天下大定垂拱而天下治定五等之封凡千七百七十三國又滅湯時千三百國人衆之損亦如之周公相成王致理刑措人口千三百七十萬四千九百二十三此周之極盛也及昭

王南征不還穆王荒耄加以幽厲之亂平王東遷三十餘年莊王十三年齊桓公二年五千里外非天子之御自太子公侯以下至於庶人凡千一百八十四萬一千九百二十三人其後諸侯相并尚有千二百國至於戰國存者十餘於是縱橫短長之說相奪於殘人詐力之兵動以萬計伊闕之敗斬首二十四萬長平之戰血流漂鹵周之列國唯秦楚燕而已齊及三晉皆以篡亂衛雖得存不絕如綫然攻蘇張之說秦及山東戍卒尚踰

五百餘萬推人口數尚當千餘萬也

### 李冰渠

楊雄云蜀有李冰渠秦蜀守通華陽國志秦孝文王以李冰為蜀守冰乃壅江作堋穿郫江檢江別支流雙過郡下以行舟船岷山多梓柏大竹頽隨水流坐致材木功省用饒又溉灌三郡開稻田於是蜀沃野千里號為陸海旱則引水浸潤雨則杜塞水門故記曰水旱從人不知饑饉時無荒年天下謂之天府也外作石犀五頭

以厭水精穿石犀溪於江南命曰犀牛里後轉置犀牛  
二頭一在府市市橋門今所謂石牛門是也一在淵中  
乃自前堰上分穿羊摩江灌江西於玉女房下自涉郵  
作三石人立三水中與江神要水竭不至足盛不沒肩  
時青衣有沫水出蒙山下伏行地中會江南安觸山脇  
涸崖水脉漂疾破害舟船歷代患之永發卒鑿平涸崖  
通正水道水又通笮通汶井江徑臨邛與蒙溪分水白  
木江會武陽天社山下合江又導洛通山洛水或出瀑

口經什邡郫別江會新都大渡又有綿水出紫岩山經  
綿竹入洛東流過資中會江陽皆溉灌稻田膏潤稼穡是  
以蜀川人稱郫繁曰膏腴綿洛為浸沃也又識齊水脉  
穿廣都鹽井諸陂池蜀於是盛有養生之饒焉又風俗  
通云秦昭王使陳永為蜀郡太守開成都兩江溉田萬  
頃無復水旱之災歲常豐歉史記云蜀守冰鑿離碓辟  
沫水之害穿二江成都之中理道要訣云秦以李冰為  
蜀郡太守透百丈堰灌田數千頃蜀以富饒

鄭國渠

通鑑始皇元年韓欲疲秦人使無東伐乃使水工鄭國為間於秦鑿涇水自仲山為渠並北山東注洛中作而覺秦人欲殺之鄭國曰臣為韓延數年之命然渠成亦秦萬世之利也乃卒使為之注填闕之水溉烏鹵之地四萬餘頃收皆畝一鍾關中由是益富饒通典京兆雲陽縣有鄭國渠班志涇水出安定郡涇陽縣西筭頭山東至馮翊陽陵縣入渭過郡三行千六百里師古曰注引

也填闕謂壅泥也言引淤濁之水灌鹹鹵之地更令肥  
美故一畝之收至六斛四斗杜佑曰古者百步為畝秦  
漢以降即二百四十步為畝唐夷狄傳杜佑謂秦漢鄭  
渠溉田四萬頃白渠溉田四千五百頃永徽中兩渠灌  
浸不過萬頃大厯初減至六千頃頃賸一斛歲少四五  
百萬斛後兩渠之饒誘農夫趣耕河隴可復

### 君主妻河

史記秦靈公八年城塹河頻初以君主妻河索隱曰謂

初以此年取他女為君主猶公主也妻河謂嫁之河伯  
余按魏俗亦為河伯娶婦然民女耳秦乃以君主甚矣  
魏自西門豹為鄴令此俗遂絕秦則靈公已下世世守  
為常法史曰初者明後世不改也

江神聘婦

風俗通云秦昭王伐蜀令李冰為守江水有神歲取童  
子二人為婦主者出錢百萬以行聘冰曰不須吾自有  
女到時裝飾其女當以沉江水徑上坐舉酒酹曰今得



傳九族君天神當見尊顏相為進酒冰先投杯但澹淡  
不耗厲聲曰江君將興當相伐耳拔劍忽然不見良久  
有蒼牛鬬於岸有頃冰還謂官屬令相助曰南向要中  
正白者我綬也還復對鬬主簿刺殺其北面者江神死  
後無復患



田齊食貨

河渠附

粟

蘇秦曰齊地方二千里帶甲數十萬粟如山丘按詩含  
神霧云齊地處孟春之位海岱之間土地汙泥流之所  
歸利之所聚律中太簇音中宮角

魚鹽

國策齊湣王獻魚鹽之地三百於秦按管子云齊有渠  
展之鹽請君伐菹薪煮水為鹽

煮涉水也

征而積之十月至

正月成三萬六千鍾下令曰孟春農事起無得煮鹽此則坐長十倍桓公糶之得成金萬一千斤國語云齊通魚鹽於東萊

田租 徭役

說苑齊宣王出獵於社山社山父老十三人相與勞王王曰父老苦矣謂左右賜父老田不祖父老皆拜閭丘先生獨不拜又賜無徭役諸父老皆拜閭丘先生又不拜

河隄

賈讓治河三策云隄防之作近起戰國齊與趙魏以河為境齊地卑下作隄去河二十五里雖非其正水尚有所游盪時至而去則填淤肥美民耕田之或久無害稍築室宅排水澤而居之湛溺固其宜也按宋太祖云夏后治水但言導河至海隨山濬川未聞力制湍流廣營高岸自戰國專利堙塞故道以小妨大以私害公九河之制遂隳歷代之患弗弭



楚食貨 河渠附

粟

蘇秦曰楚地方五千里帶甲百萬車千乘騎萬匹粟支  
十年

橘柚

蘇秦說趙肅侯大王誠能聽臣燕必致氈裘狗馬之地  
齊必致魚鹽之地楚必致橘柚雲夢之地屈原九章有  
橘頌后皇嘉樹橘徠服兮受命不遷生南國兮言楚王

好草木之樹而橘生其土也

三錢

越世家楚王赦常封三錢之府注金幣三等也又楚有銅官洲鑄錢其上詳職官

更幣

史記孫叔敖為楚相莊王以為幣輕更以小為大百姓不便相言之王復如故

賦



左傳楚為掩為司馬子木使它賦數甲兵甲午為掩書  
土田度山林鳩數澤辨京陵表淳鹵數疆潦規偃豬町  
原防牧隰皋井衍沃量入修賦賦車籍馬賦車兵徒兵  
甲楯之數既成以授子木禮也

均輸

越絕書吳兩倉春申君所造西倉名曰均輸東倉周一  
里八步

芍陂

皇覽云楚大夫子思造芍陂水利通考云楚孫叔敖起芍陂而楚受其利淮南子孫叔敖決期思之水而灌雩婁之野莊王知其可以為令尹也一統志云孫叔敖為楚相截汝墳之水作塘以溉田民獲其利

無錫湖 申浦

越絕書云無錫湖者春申君治以為陂鑿語昭瀆以東到大田田名胥卑鑿胥卑下以南注大湖以寫西野去縣三十五里一統志南直常州申浦在江陰縣西三十

里昔春申君開置田為上下屯自大江南導分而為二  
東入無錫西入武進戚墅俱達於運河今江陰之山川  
多以春申取義

### 溝渠

漢書溝洫志於楚西方則通渠漢川雲夢之際東方則  
通溝江淮之間



趙食貨

粟

蘇秦曰趙粟支十年陸深燕閒錄曰禹貢八州皆有貢物而冀州獨無之冀即今之山西土瘠天寒生物鮮少蓋自古而然余按山西在戰國時大半屬趙以此知趙亦瘠國也

田稅

史記平原君家不肯出田稅趙奢為趙田部吏以法治

平原用事者九人列國紀聞云稅歛之法趙不如楚楚不如秦深言秦賦之繁也

趙錢

古錢經云趙錢仍晉舊內外皆圓 史記趙王使人徵隨張儀奉以車馬金錢不言錢制未知經文何據世言錢起於太公九府圜法前漢志云凡貨金錢布帛為用夏殷以來其詳靡記鹽錢論云夏后氏以貝殷以紫石后世或金錢刀布故或疑周以前未用錢也然史記曰

紂厚賦歛以實鹿臺之錢又曰散鹿臺之錢高謙之曰  
昔禹遭大水以厯山金鑄錢救人之困湯遭大旱以莊  
山金鑄錢贖人之僨子是三代皆已鑄錢不但周也宋  
洪遵所纂泉志其正用品有虞錢夏錢商錢周錢景王  
錢齊錢晉錢楚錢趙錢

漳水

趙惠文王二十四年趙徙漳水武平曲





魏食貨

河渠附

行田百畝

漢書志云襄王以史起為鄴令起進曰魏氏之行田也以百畝鄴獨二百畝是田惡也注云以百畝謂賦田之法一夫百畝

盡地力之教

通典魏文侯使李悝作盡地力之教以為地方百里提封九萬頃除山澤邑居三分去一為田六百萬畝理田

勤謹則晦益三升

臣瓚曰當言三斗謂治田勤則晦益三斗

不勤則損亦如

之地方百里之增減輒為粟百八十萬石必雜五種以備災害力耕數畝收穫如寇盜之至環廬樹桑菜茹有畦瓜瓠果蓏殖於疆場

地大稅寡 什一之稅

荀子論魏兵云地雖大其稅必寡是危國之兵也注云優復既多則稅寡資用貧乏之故國危什一之稅詳李悝糴法又魏文侯時租賦倍增於常或有貧者文侯曰今

口不加而租賦歲倍此由課多也譬彼治治令大則薄  
令小則厚治人亦如之夫貪其賦稅不愛人是猶虞人  
反裘而薪也徒惜其毛而不知皮盡而毛無所附

賦鳩 賦口

文選箋引尸子注云魏之於百姓也日食不賦鳩民疫  
不賦口許慎淮南注戰國收民役賦不畢者榜之於格上不得下故曰挑格而死也

農官讀法

桓子新論魏三月上祀農官讀法法曰耒無十其羽耜

無泥其塗春田如布平以直夏田如驚秋田惕惕如寇  
來不可測冬田吳越視上上之田收下下女則有罰下  
下之田收上上女則有賞

李悝平糴

漢書李悝既為文侯作盡地力之數又曰糴甚貴傷民  
此民謂士工商也甚賤傷農民傷則離散農傷則國貧故甚貴

與甚賤其傷一也善為國者使民不傷而農益勸今一  
夫挾五口治田百畝歲收畝一石半為粟百五十碩除

什一之稅

據此魏亦行什一稅法也

十五碩餘百三十五碩食人月

一碩半五人終歲為粟九十碩餘有四十五碩碩三十為錢千三百五十除社閭嘗新春秋之祠用錢三百餘千五十衣人率用錢三百五人終歲用千五百不足四百五十不幸疾病死喪之費及上賦歛又未與此此農所以常困有不勸耕之心而令糴至於甚貴者也故善

平糴者謹視歲有上中下孰上孰其收自四餘四百石

張晏曰平歲百畷收百五十石今大孰四倍收六百石計民食終歲長四百石官糴三百石此為糴三而舍一

也中孰自三餘三百石

自三四百五十石也終歲長三百石官糴二百石此為糴二舍

一下孰自倍餘百石

自倍收三百石終歲長百石官糴其五十石云下孰糴一謂中分百

石之一也皆所以脩饑也

小饑則收百石

平歲百畝之收收百五十石今小饑收百石收三分

之二

中饑七十石

收二分之一也

大饑三十石

收五分之一也以此準之大小

中饑之率也

故大孰則上糴三而舍一中孰則糴二下孰則

糴一

詳見上文

使民適足賈平則止小饑則發小孰之所歛

官以歛藏出糴也

中饑則發中孰之所歛大饑則發大孰之所

歛而糴之故雖遇饑饉水旱糴不貴而民不散取有餘

以補不足也行之魏國以富强

呂祖謙曰大抵荒政統而論之先王有預

備之政上也修李悝之政次也蓄積有可均處使之流通移民移粟又次也咸無焉設糜粥最下也

### 移粟

劉向孟子注魏惠王三十五年河內復旱秋無禾於是惠王乃議移食羣臣曰不可民不可移也將軍王教曰天乙逐桀囚之漆城武王伐紂黃鉞斬首聖人造事其次繼事因事最下今羣臣皆因王其造之於是惠王移民河東以就食移粟河內以給癰老三十六年河東大

山移民河內以就食而移粟於河東

發數

薛瓚漢注引汲郡古文云梁惠王發逢忌之數以賜民  
又魏文侯有御廩見說苑

十二渠

魏文侯時西門豹為鄴令往到鄴問民疾苦長老曰苦  
為河伯娶婦以故貧鄴三老廷掾常歲賦歛百姓得錢  
數百萬用其三十萬為河伯娶婦當其時巫行視民家



好女輒聘為河伯婦為治新繒綺縠衣閤居齋戒築齋  
宮河上張緹絳帷女居其中為具牛酒飲食共粉飾之  
如嫁女狀浮之河行數十里乃沒民俗相戒曰即不為河  
伯娶婦水來漂沒溺其人民云西門豹曰嫁河伯婦願  
往觀也於是嫁河伯婦時三老官屬豪長者里父老皆  
會民送觀者三千人西門豹亦往會河上其巫老女子  
也年七十從女弟子皆衣繒單衣立大巫後西門豹曰  
呼河伯婦來因出女帷中豹顧謂三老巫祝曰女醜大

巫可入報河伯當更求好女命投大巫河中有頃曰何  
久也弟子趣之復投一弟子河中有頃又投一弟子河  
中如是者三西門豹曰女子不能白事復投三老河中  
西門豹簪筆磬折立河上待良久欲復使廷掾與豪長  
者入趣之皆叩頭且流血曰不敢復為河伯娶婦鄴  
吏民大驚於是西門豹曰害不去利不興非國也吾為  
魏興利鑿渠十二父老子弟雖煩苦然百歲後期令父  
老子弟思吾言即發民鑿十二渠引河水灌民田魏由

是得水利見史記

漳渠

漢書溝洫志文侯曾孫襄王即位與羣臣飲酒祝曰令  
吾臣皆如西門豹也史起進曰魏氏之行田也以田畝  
鄴獨二百畝是田惡也漳水在其旁西門豹不知用是  
不智知而不興是不仁仁智豹未之盡何足法也於是  
以史起為鄴令遂引漳水溉鄴以富魏之河內民歌之  
曰鄴有賢令兮為史公決漳水兮灌鄴旁終古烏鹵兮生

稻梁史河渠書曰西門豹引漳水溉鄴以富魏之河內  
與漢書異一統志亦云河南彰德府有西門渠云西門  
豹所鑿引漳水以溉田杜氏通典云漳渠史起所鑿史  
記誤不知當據何說也按左思魏都賦西門溉其前史  
起灌其後澄流十二同原異口畜為屯雲泄為行雨晉東

哲傳云兩周爭東周之流史記惜漳渠之浸明地利  
之重也括地志云漳水源出潞州長子縣西力黃山

### 白圭治水

宋蘇軾雜策云方戰國之用兵國於河之壩者三晉為

多而魏文侯時白圭治水最為有功而孟子譏其以鄴國為壑

李悝廢溝洫

水利拾遺云李悝以溝洫為墟自謂過於周公

北郭大溝

玉海二十一卷內引水經注云浚儀縣竹書紀年梁惠成王三十一年三月為大溝於北郭以行圃田之水今按竹書紀年云梁惠成王十年入河水於甫田又為大

溝而引甫水

河伯娶婦

詳見十二渠 按玉海云河患自戰國始而禹功廢矣  
周譜云定王五年河徙矜礫盖已失其故道大事記云  
威烈王十三年晉河岸崩壅龍門至於底柱春秋後河  
患見史傳始於此賈讓曰戰國壅防百川各以自利此  
孟子所謂以鄰國為壑也王橫曰秦攻魏決河灌其都  
決處遂大不可復補噫微禹吾其魚乎秦灌大梁以魚

其民禍不止於一時而河流潰溢遂為無窮之患重以  
決通隄防墮壞禹迹甚矣其不仁也李垂導河勝書曰  
春秋二百四十年有二災異畢書獨不書河決者夏禹  
故道尚存也





韓食貨

粟

按國策蘇秦說秦惠王曰秦沃野千里蓄積饒多說齊  
宣王曰齊粟如丘山說楚威王曰楚粟支十年說趙肅  
侯曰趙粟支十年說燕文侯曰燕粟支十年獨韓魏不  
言粟諱之也張儀為秦說韓王曰韓地儉惡山居五穀  
所生非麥而豆民之所食大抵豆飯藿羹一歲不收民  
不厭糟糠地方不滿九百里無二歲之所食



燕食貨

粟 丹泉粟

蘇秦曰燕地方二千里帶甲數十萬車七百乘騎六千  
匹粟支十年南有碣石鴈門之饒北有棗粟之利民雖  
不田作棗粟之實足食於民矣此所謂天府也拾遺記  
曰燕昭王即位廣延國來獻舞者二人王處以丹綃華  
幄飲以瑤珉之膏飴以丹泉之粟燕世家燕昭王弔死  
問孤與百姓同甘苦二十八年燕國殷富

棗栗

詳見上按春秋說題辭云箕尾為燕陰氣侵生欲俗云貪地利宜栗漢書云燕秦千樹栗其人與千戶侯等

魚鹽

玉海云碣石在海旁鴈門有鹽澤故云碣石鴈門之饒今人知齊有鹽利不知燕也漢書云上谷至遼東有魚鹽棗栗之饒

氊裘

蘇秦說趙肅侯曰大王能聽臣燕必致氊裘狗馬之地

七國攷卷二

欽定四庫全書

七國攷卷三

明董說撰

秦都邑

關塞附

犬丘

秦紀非子居犬丘周孝王分土為附庸邑之秦注今天  
水隴西縣秦亭也地理志今隴西秦亭秦谷是也括地  
志秦州清水縣本名秦嬴姓邑漢屬天水郡水經注清  
水逕清水城南又西與秦水合水出東北大隴山秦谷

卷三  
歷三泉合成一水而歷秦川川有故亭秦仲所封也秦  
之為號始是秦水又西南歷隴川逕六槃口過清水城  
西南注清輿地廣記秦州隴城縣有秦谷郡縣志秦城  
在隴州東南二十五里世本云秦非子始封於秦故秦  
本紀稱周孝王曰朕分之土邑秦隴西秦谷亭是也

### 廢丘

秦紀莊公居其故西犬丘世紀周懿王所都今槐里是  
也世本云秦非子玄孫莊公徙廢丘



## 汧渭之會

秦紀平王封襄公為諸侯賜之岐以西之地於是始國  
文公居西垂宮東獵至汧渭之會乃卜居之占曰吉即  
營邑之括地志故汧城在隴州汧源縣南三里世紀云  
襄公二年徙居汧即此城郿縣故城在岐州鳳翔府郿  
縣東北十五里文公東獵汧渭之會卜居之乃營邑焉  
即此城也世紀文公從汧今扶風郿縣是也

## 平陽

世紀云出公徙平陽鄆之平陽亭是也秦紀云寧公徙平陽括地志平陽故城在岐州岐山縣西四十六里秦寧公徙都之處岐山縣有平陽鄉鄉內有平陽聚武公居平陽封宮正義云在平陽城內水經注汧水逕郁夷縣逕平陽故城南

雍城

秦紀德公初居雍城大鄭宮卜居雍子孫飲馬於河世紀云今扶風雍是也括地志岐州雍縣南七里故雍城

秦德公大鄭城也秦記康公居雍高寢桓公居雍太寢  
今鳳翔府天興縣

櫟陽

秦紀獻公城櫟陽徙都之世紀今馮翊萬年是也括地  
志櫟陽故城一名萬年城在雍州東北百二十里漢七  
年分櫟陽城內為萬年縣通典漢萬年縣在京兆府櫟  
陽縣東北二十五里櫟陽故城是周明帝省萬年入廣  
陽更於長安城中置萬年縣仍移廣陽縣入舊萬年縣

城即今櫟陽縣是也

咸陽

秦紀孝公十二年作為咸陽築冀闕徙都之按別紀云  
孝公十三年始都咸陽蓋十二年築闕而十三年都之  
也世紀漢元年更名新城屬扶風後并於長安故太史  
公曰長安故咸陽也元鼎三年復別為渭城今長安西  
北渭水陽有故城西京賦秦里其朔實為咸陽括地志  
咸陽故城一名渭城在雍州咸縣東十五里京城北四

十五里即秦徙都者今咸陽縣古之杜郵劉伯莊云冀  
猶記事闕猶象魏也始皇置酒咸陽宮營作朝宮渭南  
上林苑中先作前殿阿房為閣道自殿下直抵南山為  
複道自阿房渡渭屬之咸陽自孝公至子嬰十世居咸  
陽元和郡縣圖志山南曰陽水北曰陽在北山之南渭  
水之北故曰咸陽西都賦云左據函谷二嶠之阻表以  
太華終南之山右界褒斜隴首之險帶以洪河涇渭之  
川衆流之隈汧湧其西華寔之毛則九州之上腴焉防

禦之阻則天地之奧區焉是故橫被六合三成帝畿周以龍興秦以虎視蘇秦說秦惠王曰大王之國西有巴蜀漢中之利北有胡貉代馬之用南有巫山黔中之限東有殽函之固田肥美民殷富戰車萬乘奮擊百萬沃野千里蓄積饒多地勢形便此所謂天府天下之雄國也

淮南注云神農明堂曰天府蘇秦天府二字本此謂可以建都之地也

胡三省通鑑注

云河自龍門上口南抵華陰而東流秦國在河之西山自鳥鼠同穴連延為長安南山至於秦華秦國在山之

西韓魏趙齊楚燕六國皆在河山以東荀子應侯問孫卿曰入秦何見孫卿曰其國塞險形勢便山林川谷美天材之利多形勝也入境觀其風俗其百姓樸其聲樂不流汙其服不佻甚畏有司而順古之民也及都邑官府其百吏肅然莫不恭儉敦敬忠信而不桀古之吏也入其國觀其士大夫出於其門入於公門出於公門歸於其家無有私事也不比周不朋黨倜然莫不明通而公也古之士大夫也觀其朝廷其間聽決百事不留恬

然如無治者古之朝也故四世有勝非幸也數也是所見也故曰佚而治約而詳不煩而功治之至也秦類之矣雖然則甚有其謬也兼數具者而盡有之然而縣之以王者之功名則倜倜然其不及遠矣是何也則殆其無儒耶漢書志云秦地於天官東井輿鬼之分野也其界自弘農故關以西京兆扶風馮翊北地上郡西河安定天水隴西南有巴蜀廣漢犍為武都西有金城武威張掖酒泉敦煌又西南有牂牁越雋益州皆宜屬焉秦



地於禹貢時跨雍梁二州詩風兼秦幽兩國昔后稷封  
釐公劉處幽太王徙邠文王作鄴武王治鎬其民有先  
王遺風好稼穡務本業故幽詩言農桑衣食之本甚備  
有鄠杜竹林南山檀柘號稱陸海為九州膏腴始皇之  
初鄭國穿渠引涇水溉田沃野千里民以富饒漢興立  
都長安徙齊諸田楚昭屈景及諸功臣家於長陵後世  
世徙吏二千石高訾富人及豪傑并兼之家於諸陵蓋  
亦以彊幹弱支非獨為奉山園也是故五方雜厝風俗

不純其世家則好禮文富人則商賈為利豪傑則遊俠  
通姦瀕南山近夏陽多阻險輕薄易為盜賊常為天下  
劇又郡國輻湊浮食者多民去本就末王侯貴人車服  
僭上衆庶放效羞不相及嫁娶尤崇侈靡送死過度天  
水隴西山多林木民以板為室屋及安定北地上郡西  
河皆迫近戎狄修習戰備高上氣力以射獵為先故秦  
詩曰在其板屋又曰王于興師修我甲兵與子偕行及  
車轡四鐵小戎之篇皆言車馬田狩之事漢興六郡良

家子選給羽林期門以材力為官名將多出焉孔子曰  
君子有勇而無義則為亂小人有勇而無義則為盜故  
此數郡民俗質木不耻寇盜自武威以西本匈奴昆邪  
王休屠王地武帝時攘之初置四郡以通西域隔絕南  
羌匈奴其民或以關東下貧或以報怨過當或以悖逆  
無道家屬徙焉習俗頗殊地廣民稀水草宜畜牧故涼  
州之畜為天下饒保邊塞二千石治之咸以兵馬為務  
酒禮之會上下通焉吏民相親是以其俗風雨時節穀

糴常賤少盜賊有和氣之應賢於內郡此政寬厚吏不苛刻之所致也巴蜀廣漢本南夷秦并以為郡土地肥美有江水沃野山林竹木疏食果食之饒南賈滇僂僅西近邛笮馬旄牛民食稻魚無凶年憂俗不愁苦而輕易淫佚柔弱褊阨景武間文翁為蜀守教民讀書法令未能篤信道德反以好文刺譏貴慕權勢及司馬相如游宦京師諸侯以文辭顯於世鄉黨慕循其迹後有王褒嚴遵揚雄之徒文章冠天下繇文翁倡其教相如為之

師故孔子曰有教無類武都地雜氐羗及犍為牂牁越  
雋皆西南外夷武帝初開置民俗略與巴蜀同而武都  
近天水俗頗似焉故秦地天下三分之一而人衆不過  
什三然量其富居十六秦幽吳札觀樂為之歌秦曰此  
之謂夏聲自井十度至柳三度謂之鶉首之次秦之分  
也又漢志云雍州其山鎮曰吳嶽國語謂之西吳古文  
以為汧山秦都咸陽以為西嶽

函谷關

以下附 東

賈子過秦論曰秦孝公據殽函之固范雎謂左闕阪即  
殽函也鹽鐵論曰秦包商洛殽函以禦諸侯淮南墜形  
訓九塞曰殽阪按函谷關在陝州靈寶縣西南十二里  
西征記曰關城路在谷中深險如函故以為名其中劣  
通東西十五里絕岸壁立崖上栢林陰谷中殆不見日  
關去長安四百里日入則閉鷄鳴則開秦法也東自崤  
山西至潼津通名函谷號曰天險所謂秦得百二也孟  
嘗君客雞鳴出函谷燕太子丹亦雞鳴出函谷百物志

云秦前有藍田之鎮後有故苑之塞左峭函右隴蜀西  
通流沙險阻之國也西征賦云躡函谷之重阻看天險  
之襟帶跡諸侯之勇怯算嬴氏之利害或開關以延  
敵競遁逃以奔竄有噤門而莫啓不窺兵於山外班固  
西都賦注云函谷者其谷似函故曰函谷江統函谷關  
賦云唯七國之西征仰斯阻而震恐豈懊險之難犯將  
羣帥之無勇鹽鐵論云諸侯之有關梁庶人之有爵祿  
非升平之興蓋自戰國始也

武關

南

散關

西

蕭關

北

臨晉關

張儀曰秦地被山帶河四塞以為固徐廣曰東函谷南武關西散關北蕭關武關即建武關也張衡東京賦秦負阻於二關注云二關武關函谷關也通鑑即墨大夫見齊王曰齊地方數千里帶甲數百萬王收而與之百萬人之衆使收三晉之故地即臨晉之關可以入矣鄆郢大夫不欲為秦而在城南下者百數王收而與之百萬之師使收楚故地即武關可以入矣胡三省云收三



晉兵自河東攻秦則入臨晉關楚攻秦自南陽入武關  
七國形勢攷云秦地西有隴關東有函谷臨晉南有嶢  
武關北有蕭關居庸天井關以臨胡庭故曰關中賈誼新  
書云所為建武臨晉函谷關者大抵備山東諸侯也武  
關在商州商洛以限南諸侯函谷在陝州靈寶以限北  
諸侯臨晉在同州朝邑以限東諸侯隴關即隴山關也  
七國形勢考引正義云秦東有函谷蒲津龍門合河等  
關南山及武關嶢關西有大隴山及隴山關大震烏蘭

等關北有黃河南塞故曰被山帶河四塞以為固臣瓚  
曰臨晉者秦築高壘以臨晉國故曰臨晉

湖關

史記秦昭王使謁者王稽於魏載范雎入秦至湖關望  
見穰侯車騎東行縣邑

松栢塞

荀子曰秦有松栢之塞

焉氏塞 鄭所塞

呂覽曰公子連亡在魏欲入從鄭所之塞右主然守塞弗入公子連去入翟從焉氏塞箇改入之

### 長城

王應麟曰秦昭王滅義渠於是秦有隴西北上郡築長城以距胡非自始皇始也古今注云秦築長城土色皆紫故稱紫塞楊泉物理論云始皇使蒙恬築長城死者相屬民歌曰生男慎勿舉生女哺用哺不見長城下尸骸相撐拄北邊備對云秦城多承燕趙燕城起於造陽

而至襄平遼陽造陽者上谷地也襄平者遼東縣也遼陽者遼水之北也皆燕國邊胡之地故其建築亦在此地也趙之城則自代地而西屬於高闕代者鴈門都也高闕者靈州北流河之西陰山之上游也趙武靈王國於雲代故其備河之城但能並河而西以極乎趙境耳至秦已并六國天下為一西自上郡北地而東至遼東西悉為秦有故蒙恬之致役也西起臨洮則中國極西之地也北屬遼東則中國極東之地也自東迄西殆萬

餘里無論燕趙之與岷蘭其在當時蓋無一地而無長城也於是會合三制而要其所宿則秦城之長固周乎中國之北矣然審而求之則其城不皆秦築也秦但補築使足耳元和志云開皇城自代之繁時縣北經蔚州北十里入飛狐縣夫其自代而蔚則極北而盡乎邊中國之地不出此外秦人為城以城中夏勝地固當在此矣志又曰開皇城起嵐州合河縣經幽州皆因古跡修築夫嵐州者樓煩郡也初為胡地後為趙惠文所取則

合河縣固可立城矣幽州者戰國時屬燕地則非趙人  
所有何由可施版築也是前乎燕趙別有築之者史所  
不傳故槩言因古跡修築也

田齊都邑

關塞附

臨淄

通釋齊田和立為齊侯都臨淄國策蘇秦說齊宣王曰  
齊南有泰山東有瑯琊西有清河北有渤海此所謂四  
塞之國也臨淄甚富而實其民無不吹竽鼓瑟擊筑彈  
琴鬪雞走犬六博蹋鞠者臨淄之途車轂擊人肩摩連  
袂成帟舉袂成幕揮汗成雨家敦而富志高而揚田肯  
曰齊東有瑯琊即墨之饒南有泰山之固西有濁河之

限北有渤海之利地方二千里持戟百萬縣隔千里之外齊得十二焉此東秦也荀卿子說齊相曰今巨楚縣吾前大燕鮑吾後勁魏鈞吾右西壤之不絕若繩楚人則有襄賁開陽以臨吾左是一國作謀則三國必起而乘我如是則齊必斷而為四三國若假城然耳鹽鐵論曰齊撫阿甄關榮厯倚泰山負海隅漢地理志曰齊地虛危之分野也東有淄川東萊琅邪高密膠東南有泰山城陽北有千乘清河以南渤海之高樂高城重合陽



信西有濟南平原皆齊分也少昊之世有爽鳩氏虞夏  
時有季荝湯時有逢公柏陵殷末有薄姑氏皆為諸侯  
國此地至周成王時薄姑氏與四國共作亂成王滅之  
以封師尚父是為太公詩風齊國是也臨淄名營丘故  
齊詩曰子之營兮遭我乎穰之間兮又曰俟我于著乎  
而此亦其舒緩之體也吳札聞齊之歌曰泱泱乎大風  
也哉其太公乎國未可量也古有分土亡分民太公以  
齊地負海島鹵少五穀而人民寡乃勸以女工之業通

魚鹽之利而人物輻湊後十四世桓公用管仲設輕重以富國合諸侯成霸功身在陪臣而取三歸故其俗彌侈織作冰紈綺繡純麗之物號為冠帶衣履天下初太公治齊修道術尊賢智賞有功故至今其土多好經術矜功名舒緩濶達而足智其失夸奢朋黨言與行繆虛詐不情急之則離散緩之則放縱始桓公兄襄公淫亂姑姊妹不嫁於是令國中民家長女不得嫁名曰巫兒為家主祠嫁者不利其家民至今以為俗痛乎道民之

道可不慎哉臨淄海岱之間一都會也其中具五民云

陽關

以下附南

博物志云齊南有長城巨防陽關之險北有河濟足以為固越海而東通於九夷西界岱嶽配林之險坂固之國也史記齊世家魯伐我入陽關徐廣曰在鉅平括地志云兗州博平縣南二十九里西臨汶水

穆陵關

山東志穆陵關在沂水縣北一百二十里古齊關也

博關

張儀說齊曰悉趙兵渡清河指博關臨淄即墨非王之有也史記齊宣王二年三晉之王皆因田嬰朝齊王於博望關而去輿地廣記博州戰國屬齊趙衛三國之交徐廣曰齊威王六年晉伐齊至博陵

長城

泰山記云泰山西有長城緣河徑泰山千餘里至琅邪臺入海國策蘇秦云長城鉅防以為塞齊記云齊宣王

乘山嶺之上築長城東至海西至濟州千餘里以備楚  
括地志西北起濟州平陰縣緣河歷泰山城岡上經濟  
州淄州即西南兗州傳城縣北東至密州琅邪臺入海  
正義長城西在濟州平陰縣界竹書紀年梁惠成王二  
十年齊閔王築防以為長城郡縣志故長城首起鄆州  
平陰縣北二十九里齊湣王所築外紀威烈王十六年  
王命韓趙伐齊入長城田世家趙人歸我長城在齊威  
王時山東志齊長城在諸城縣南四十里跨安丘境連

巨蒙泰萊蕪直至平陰乃齊宣所築以禦楚寇者

楚都邑

關塞附

丹陽

通釋楚熊繹當周成王時封於楚蠻居丹陽輿地志秭  
歸縣東有丹陽城周迴八里熊繹始封也丹陽凡有數  
處楚鬻熊始封丹陽則在今秭歸縣后楚文王徙都江  
陵府枝江縣亦曰丹陽漢於宛陵置丹陽郡隋於丹州  
置丹陽郡唐於京口置丹陽郡而西漢志乃以曲阿之  
丹陽為楚所封誤矣

郢

楚文王始都郢括地志云平王城郢在江夏陵縣東北  
六里故郢城是也楚始都丹陽在今枝江文王遷郢昭  
王遷鄢皆在今江陵境中杜預左傳注云楚國今南郡  
江陵縣北紀南城也謝靈運鄴中集詩云南登宛郢城  
今江陵北十二里而有紀南城即古之郢都也又謂之  
南郢桓譚新論曰楚之郢都車掛轂民摩肩市路相交  
號為朝衣新而暮衣敝



郢

楚昭王去郢北徙都郢輿地廣記郢縣故郢國春秋時  
自商密遷此為楚附庸楚滅之昭王畏吳自郢遷焉後  
復還郢吳越春秋作昭王徙於蔿若注云蔿若字誤當  
作郢蘇秦說楚威王曰楚地西有黔中巫郡東有夏州  
海陽南有洞庭蒼梧北有陘塞郢陽

陳城

楚襄王二十三年秦拔郢東北保於陳城

壽春

卷三

考烈王二十二年東徙都壽春命曰郢今安豐軍壽春  
縣漢地理志云楚地翼軫之分野也今之南郡江夏零  
陵桂陽武陵長沙及漢中汝南郡盡楚分也周成王時  
封文武先師鬻熊之曾孫熊繹於荊蠻為楚子居丹陽  
後十餘世至熊達是為武王寢以彊大後五世至嚴王  
總帥諸侯觀兵周室并吞江漢之間內滅陳魯之國後  
十餘世項襄王東徙於陳楚有江漢川澤山林之饒江

南地廣或火耕水耨民食魚稻以漁獵山伐為業果蓏  
蠃蛤食物常足故盜竊偷生而亡積聚飲食還給不憂  
凍餓亦無千金之家信巫鬼重淫祀而漢中淫佚枝柱  
與巴蜀同俗汝南之別皆急疾有氣勢江陵故郢都西  
通巫巴東有雲夢之饒亦一都會也

扞關以下附

七國形勢考云楚肅王四年周安王二十五年蜀伐楚  
取茲方楚為扞關以拒之鹽鐵論云楚自巫山起方城

屬巫黔中設扞關以拒秦一名捍關括地志今峽州巴  
山縣界張儀說楚王曰秦西有巴蜀大船積粟起於汶  
山浮江以下不至十日而距扞關扞關驚則從竟陵以  
東盡城守矣黔中巫郡非王之有

江關 陽關

華陽國志巴楚相攻伐故置江關陽關括地志云江關  
今夔州魚復縣南二十里江南岸白帝城是陽關今涪  
州永安縣治關城也

弱關

水經注江水自關東逕弱關捍關弱關在建平秭歸界  
昔巴楚數相攻伐藉險置關以相防捍

昭關

范曄傳子胥索載而出昭關夜行晝伏

陘塞

國策北有汾陘之塞徐廣曰春秋齊伐楚次于陘楚威  
王十一年魏敗楚陘山在密縣正義曰陘山在鄭州新

鄭縣西南三十里楚世家魏取我陁山今按陁塞其說  
有三山海經有少陁之山太平御覽謂滎陽則正義新  
鄭近之滎陽春秋為鄭戰國為韓蓋南北之隘道楚為  
塞以禦北方故蘇秦於韓曰南有陁山於楚曰北有陁  
塞其地一也楚漢亦於此決勝負焉左傳楚子庚治兵  
於汾注云襄城縣東北有汾丘城今襄城屬汝州汾陁  
之塞蓋在汝鄭二州

黽阨之塞

史記秦踰黽阨之塞而攻楚不便劉昭曰江夏郡鄖縣古黽阨之塞也

符離之塞

國策楚苞九夷地方千里南有符離之塞北有甘魚之口

方城 萬城

淮南兵畧訓曰楚地南卷沅湘北繞潁泗西包巴蜀東裹郢淮潁汝以為洹江漢以為池垣之以鄧林綿之以

方城山高尋雲谿肆無景荀子議兵曰汝潁以為險江漢以為池限之以鄧林緣之以方城左傳曰方城以為城地理志葉縣有長城號曰方城朱熹曰荆地勢四平其守當在外楚人謂方城為城漢水為池是也博物志云楚後背方城前及衡嶽左則彭蠡右則九疑有江漢之流實險阻之國也盛弘之荊州記云葉東界有故城始隼縣東至瀨水達沘陽界南北聯聯數百里號為方城一謂之長城南北雖無基築皆連山相接而漢水流



其南郭仲產曰苦菜于東間有方城又楚狂接輿耕於  
城之南皆傍此長山方城而名者也又唐勒秦士論云  
楚世霸南土自越以至葉弘境萬里故號曰萬城楊用  
修以方城為萬城伯晦引史記阻之以鄧林緣之以方  
城及服虔杜預之說以闢之

桓寬鹽鐵論云楚有汝淵滿堂之固



趙都邑

關塞附

趙城

史記趙之先造父封趙城通釋云在晉州趙城縣

耿

晉獻公賜趙夙耿通釋云河中府龍門縣東南索隱云  
今河東皮氏耿鄉也

原

趙世家重耳為晉文公趙衰為原大夫居原任國政括

地志故原城在懷州濟源縣西北二里左傳云襄王以原賜晉文公原不服文公伐原以示信原降以趙衰為大夫即此也原本周畿內邑也索隱曰系本成季徙原列國紀聞云襄子嘗居原

晉陽

趙世家趙襄子時知伯率韓魏攻趙趙襄子懼乃奔保晉陽列國紀聞云趙簡子居晉陽

中牟

趙獻侯治中牟索隱曰在河北非鄭之中牟地理志河南中牟縣趙獻侯自耿徙此

邯鄲

趙敬侯元年始都邯鄲蘇秦說趙肅侯曰山東之建國莫如趙強地方三千里西有常山南有河漳東有清河北有燕國宋白曰邯鄲本衛地後屬晉七國時為趙都趙敬侯自晉陽始都邯鄲地理志云自中牟徙此按史記六國年表周安王之十六年趙敬侯之元年烈王之

二年趙成侯之元年成侯二十二年魏克邯鄲是年顯王之十六年也二十四年魏歸邯鄲若敬侯已都邯鄲魏克其國都而趙不亡何也至顯王三十二年公子范襲邯鄲不勝而死是年肅侯之三年也意此時趙方都邯鄲蓋肅侯徙都非敬侯也漢志云趙地昴畢之分野趙分晉得趙國北有信都真定常山中山又得涿郡之高陽鄭州鄉東有廣平鉅鹿清河河間又得勃海郡之東平舒中邑文安東州成平章武河以北也南至浮水繁

陽內黃丘丘西有太原定襄雲中五原上黨上黨本韓  
之別郡也遠韓近趙後卒降趙皆趙分也趙中山地薄  
人衆猶有沙丘紂淫亂餘民丈夫相聚游戲悲歌慷慨  
起則椎剽掘冢作姦巧多弄物為倡優女子彈弦跕躑  
游媚富貴徧諸侯之後宮邯鄲北通燕涿南有鄭衛漳  
河之間一都會也其土廣俗雜大率精急高氣勢輕  
為姦太原上黨又多晉公族子孫以詐力相傾矜夸功  
名報仇過直嫁娶送死奢靡漢興號為難治常擇嚴猛

之將或任殺伐為威父兄被誅子弟怨憤至告訐刺史二千石或報殺其親屬鍾代石北迫近邊徼民俗慙怯好氣為姦不事農商自全晉時已患其剽悍而武靈王又益厲之故冀州之部盜賊常為它州劇定襄雲中五原本戎狄地頗有趙齊衛楚之徙其民鄙樸少禮文好射獵鴈門亦同俗於天文別屬燕

信都

李公緒趙記云趙孝成王造檀臺之宮為趙都朝諸侯



故曰信都亦見宮室攷又史記云客說張耳曰兩君羈  
旅難以獨立立趙後扶以義可以就功乃求趙歇立為  
趙王居信都

扞關以下附

蘇厲為齊遺趙王書曰秦之上郡近扞關至於榆中千  
五百里呂氏云扞者扞敵之扞非關名也趙之扞關陸  
道之關也楚之扞關水道之關也

句注塞

句注塞者呂氏春秋九塞之一也匈奴傳趙襄子踰句注而破并代張儀說燕曰昔趙襄子欲并代與代王遇於句注之塞郡縣志晉咸寧二年句注碑曰蓋北方之險有盧龍飛狐句注為之首天下之阻所以分別外內博物志云趙東臨九州西瞻恒嶽有沃瀑之流飛壺井陘之險至於潁陽涿鹿之野鹽鐵論云趙結飛狐句注以存荆代一統志云句注山在代州西二十五里一名西陁史語正義云夏屋與句注相接

## 鴈門塞

鴈門山在代州北三十五里志云以鴈出其門故名鴈門塞關因山以立凡山西之關四十有餘皆踞隘保固而聳拔雄壯則鴈門為最故趙李牧漢郅都脩邊於此匈奴不敢近塞固皆一時良將不可謂非地險也史記李牧者趙之北邊良將也常居鴈門備匈奴以便宜置吏市租皆輸入幕府為士卒費日擊數牛饗士習騎射謹烽火多聞間諜厚遇戰士為約曰匈奴即入盜即入

收保有敢捕虜者斬匈奴每入烽火謹輒入收保不敢戰如是數歲亦不亡失

高關塞

杜氏通典趙武靈王築長城自代傍陰山下至高關為塞水經注云長城之際連山刺天其山中斷兩岸雙關善能泛舉望若闕焉節收表目故有高關之名也自關北出荒中關口有城跨山結局謂之高關戍上右迄今常置重捍以防塞道

# 長城

括地志云趙武靈王長城在朔州善陽縣北今按史記  
趙肅侯七年築長城及武靈王北畧中山之地至於房  
子遂之代北至無窮西至河登黃華之上召樓緩謀曰  
我先王因世之變以長南藩之地屬阻漳滏之險立長  
城是武靈王之前已有長城疑括地志脫一字當是武  
靈王修長城也圖書記云趙簡子築長城以備胡又在  
肅侯之前矣虞氏記云趙侯自五源河曲築長城東至

陰山又於河西造大城一箱崩不就乃改卜陰曲而禱焉書見羣鵠游於雲中徘徊經日光在其下乃即於其處築城今雲中城是也

魏都邑

關塞附

魏

史記晉獻公以魏封畢萬魏城在陝州芮城縣北五里  
漢河北縣輿地廣記河中府永樂縣古魏國唐分芮城  
置水經注永樂澗水北出於薄山南流逕河北縣故城  
西故魏國也晉以封畢萬左思賦魏土者畢昴之所應  
虞夏之餘人先王之桑梓列聖之遺塵考之四隈則八  
埏之中測之寒暑則霜露所均

霍

魏悼子徙居霍晉州霍邑縣索隱曰系本云武仲生莊  
子絳無悼子又系本居篇曰魏武子居魏悼子徙霍宋  
忠曰霍地名今河東彘縣也則是有悼子系本卿大夫  
代自脫耳

安邑

地理志河東安邑魏絳自魏徙此魏世家武侯二年城  
安邑秦紀昭王二十一年魏獻安邑國策云安邑者魏



之柱國也晉陽者趙之柱國也鄆郢者楚之柱國也郡縣志安邑故城在陝州夏縣東北十五里禹所都

柱國者都也

### 大梁

魏世家惠王三十一年秦用商君東地至河而齊趙數破我安邑近秦於是徙治大梁水經注大梁城本春秋之陽武高陽鄉於戰國為大梁周梁伯之居今開封府祥符縣也魏又有少梁史記韓魏戰於少梁注魏有大梁故此稱少梁耳蘇秦說魏襄王曰大王之地南有鴻

溝陳汝南許鄆昆陽召陵舞陽新都新鄴東有淮潁煮棗無胥西有長城之界北有河外卷衍酸棗地方千里地名雖小然而田舍廬廡之數曾無所芻牧人民之衆車馬之多日夜行不絕輪輜殷殷若有三軍之衆臣竊料大王之國不下楚說趙曰秦之攻韓魏也無有名山大川之限稍蠶食之傳國都而止張儀說魏王曰魏地四平諸侯四通幅湊無名山大川之限從鄭至梁二百餘里車馳人走不待力而至梁南與楚境西與韓境北

與趙境東與齊境卒戍四方守亭障者不下十萬梁之地勢固戰場也梁南與楚而不與齊則齊攻其東東與齊而不與趙則趙攻其北不合於韓則韓攻其西不親於楚楚攻其南此所謂四分五裂之道也博物志云魏前枕黃河背漳水瞻王屋望梁山有藍田之寶浮地之淵漢地理志云魏地觜觿參之分野也其界自高陵以東盡河東河內南有陳留及汝南之召陵瀝疆新汲西華長平潁川之舞陽鄆許僞陵河南之開封中牟陽武

酸棗卷皆魏分也河內本殷之舊都周既滅殷分其畿  
內為三國詩風邶鄘衛國是也邶以封紂子武庚鄘管  
叔尹之衛蔡叔尹之以監殷民謂之三監故書序曰武  
王崩三監畔周公誅之盡以其地封弟康叔號曰孟侯  
以夾輔周室遷邶鄘之民於雒邑故邶鄘衛三國之詩  
相與同風邶詩曰在浚之下鄘曰在浚之郊邶詩又曰  
亦流於淇河水洋洋鄘曰送我淇上在彼中河衛曰瞻  
彼淇澳河水洋洋故吳公子札聘魯觀周樂聞邶鄘衛

之歌曰美哉淵乎吾聞康叔之德如是是其衛風乎至十六世懿公亡道為狄所滅齊桓公帥諸侯伐狄而更封衛於河南曹楚丘是為文公而河內殷虛更屬於晉康叔之風既歇而紂之化猶存故俗剛彊多豪桀侵奪薄恩禮好生分河東土地平易有鹽鐵之饒本唐堯所居詩風唐魏之國也周武王子唐叔在母未生武王夢帝謂己曰余名而子曰虞將與之唐屬之參及生名之曰虞至成王滅唐而封叔虞唐有晉水及叔虞子燹為

晉侯云故參為晉星其民有先王遺教君子深思小人  
儉陋故唐詩蟋蟀山樞葛生之篇曰今我不樂日月其  
邁宛其死矣他人是愉百歲之後歸于其居民皆思奢  
儉之中念死生之慮吳札聞唐之歌曰思深哉具有陶  
唐氏之遺民歟魏國亦姬姓也在晉之南河曲故其詩  
曰彼汾一曲寘諸河之側自唐叔十六世至獻公滅魏  
以封大夫畢萬滅耿以封大夫趙夙及大夫韓武子食  
采於韓原晉於是始大至於文公霸諸侯尊周室始有

河內之土吳札聞魏之歌曰美哉泯泯乎以德輔此則  
明主也文公後十六世為韓魏趙所滅三家皆自立為  
諸侯是為三晉趙與秦同祖韓魏皆姬姓也是畢萬後  
十世稱侯至孫稱王徙都大梁鮑氏謂他國有山川  
關塞唯梁無之皆以卒戍守按九域志卒戍四方守亭  
障者參列粟糧漕庾不下十萬宋都大梁太祖欲西遷  
洛陽據山河之固曰不出百年民力殫矣後山陳氏謂  
開封無山川之阻為四戰之地故太祖以兵為衛畿內

常用十四萬人

長城附

戰國之世各有長城秦昭王築長城以備邊楚有長城  
又有扞關以拒巴趙肅侯築長城以備邊齊宣王乘山  
嶺之上築長城東至海西至濟州以備楚燕築長城自  
造陽至襄平置上谷漁陽右北平遼東以拒敵魏之長  
城自惠王築也攷竹書紀年梁惠成王十二年龍賈帥  
師築長城於西邊魏世家惠王十九年築長城塞固陽



城自鄭濱洛以北有上郡當是時秦數侵魏而西戎義渠稱王窺中國故築長城焉鹽鐵論曰魏濱洛築城阻山帶河以保晉國

欽定四庫全書

卷三

韓都邑

關塞附

韓原

韓世家韓之先與周同姓姓姬氏其後苗裔事晉得封於韓原曰韓武子武子後三世為韓厥從封姓為韓氏索隱曰按左傳云邾晉應韓武之穆則韓是武王之子然詩稱韓侯出祖則是有韓而先滅今據此文云其後裔事晉封於韓原曰韓武子則武子本是韓之後晉又封之於韓原即今之馮翊縣是也系本云韓萬生昧伯

賁伯生定伯簡簡生輿輿生獻子厥

州

宣子徙居州漢河內州縣括地志懷州武德縣本周司  
寇蘇忿生之州邑也

平陽

貞子徙居平陽晉州臨汾縣世奉云景子徙平陽

鄭

哀侯二年滅鄭因徙都鄭改號曰鄭蘇秦說韓王曰韓

北有鞏洛成臯之固西有宜陽商阪之塞東有宛穰洧  
水南有陘山地方九百餘里國策顏子曰韓天下之咽  
喉魏天下之胃腹玉海云晉楚之霸也爭鄭秦之并六  
國也始於韓以虎牢成臯之險也秦拔成臯滎陽十九  
年而韓亡圖書編云河南豫州之地平夷洞達九有一  
轂八面受敵之場也而戰國之時韓魏以區區之陋邦  
北縈南齊環繞數千里界於秦楚齊趙四大國之間無  
再會不受敵而虎狼之秦搏噬尤亟其勢可謂危矣而

終能雞唱荷戈月沉擊柝繼世相仍為二百年之戰國  
及與齊楚皆亡夫以二百年韓魏之君豈皆賢哉咸能  
不失疆土則以生於憂患故耳漢地理志云韓地角亢  
氐之分野也韓分晉得南陽郡及潁川之父城定陵襄  
城潁陽潁陰長社陽翟郟東接汝南西接弘農得新安  
宜陽皆韓分也及詩風陳鄭之國與韓同星分焉鄭國  
今河南之新鄭本高辛氏火正祝融之虛也及成皐滎  
陽潁川之崇高陽城皆鄭分也本周宣王弟友為周司

徒食采於宗周畿內是為鄭鄭桓公問於史伯曰王室  
多故何所可以逃死史伯曰四方之國非王母弟甥舅  
則夷狄不可入也其濟洛河潁之間乎子男之國號會  
為大恃勢與險窳侈貪冒君若寄帑與賄周亂而敝必  
將背君君以成周之衆奉辭伐罪亡不克矣公曰南方  
不可乎對曰夫楚重黎之後也黎為高辛氏火正昭顯  
天地以生柔嘉之材姜嬴荊芊實與諸姬代相干也姜  
伯夷之後也嬴伯益之後也伯夷能禮於神以佐堯伯

益能儀百物以佐舜其後皆不失祠而未有興者周衰將起不可逼也桓公從其言乃東寄帑與賄號會受之後三年幽王敗桓公死其子武公與平王東遷卒定號會之地右雒左汭食溱洧焉土陋而險山居谷汲男女亟聚會故其俗淫鄭詩曰出其東門有女如雲又曰溱與洧方濯濯兮士與女方秉管兮恂盱且樂惟士與女伊其相謔此其風也吳札聞鄭之歌曰美哉其細已甚民弗堪也是其先亡乎自武公後二十三世為韓所滅



韓自武子後七世稱侯六世稱王五世而為秦所滅秦  
既滅韓徙天下不軌之民於南陽故其俗夸奢上氣力  
好商賈漁獵藏匿難制御也宛西通武關東受江淮一  
都之會也自東井六度至亢六度謂之壽星之次鄭之  
分野與韓同分

商阪

以下附

西

蘇秦說韓宣惠王曰韓北有鞏洛成臯之固西有宜陽  
商阪之塞六國表秦孝公十六年城商塞玉海云商阪

一作商塞即商山也在商州商洛縣南一里亦曰楚山武關在焉

成臯

北

困學紀聞云虎牢之險天下之樞也在號曰制在鄭曰虎牢在韓曰成臯鹽鐵論云韓阻宜陽伊闕要成臯太行

燕都邑

關塞附

薊

通釋周武王封召公於北燕都薊輿地廣記武王封帝  
堯之後於薊又封召公於北燕其後燕國都薊詩補傳  
曰薊後改為燕猶唐之為晉荆之為楚或曰黃帝之後  
封於薊者已絕成王更封召公奭於薊為燕蘇秦說燕  
文侯曰燕東有朝鮮遼東北有林胡樓煩西有雲中九  
原南有呼沱易水博物志云燕却背沙漠進臨易水西

至君都東至於遼長蛇帶塞險陸相乘也鹽鐵論云燕塞碣石絕邪谷繞援遼蘇代見燕王曰天下戰國七燕處弱焉獨戰則不能有所附則無不重南附楚楚重西附秦秦重中附韓魏韓魏重韓非子曰燕襄王以河為境以薊為國襲涿方城殘齊平中山有燕者重無燕者輕注方城涿之邑也漢地理志云燕地尾箕分野也武王定殷封召公於燕其後三十六世與六國俱稱王東有漁陽右北平遼西遼東西有上谷代郡鴈門南得涿郡之易容城

范陽北新城固安涿縣良鄉新昌及渤海之安次皆燕分也樂浪玄菟亦宜屬焉燕稱王十世秦欲滅六國燕王太子丹遣勇士荊軻西刺秦王不成而誅秦遂舉兵滅燕薊南通齊趙勃碣之間一都會也初太子丹賓養勇士不愛後宮美女民化以為俗至今猶然賓客相過以婦侍宿嫁取之夕男女無別反以為榮後稍頗止然終未改其俗愚悍少慮輕薄無威亦有所長敢於急人燕丹遺風也上谷至遼東地廣民希數被兵警俗與趙

代相類有魚鹽棗栗之饒北隙烏丸夫餘東賈真番之  
利玄菟樂浪武帝時置皆朝鮮濊貉句驪蠻夷殷道衰  
箕子去之朝鮮教其民以禮義田蠶織作樂浪朝鮮民  
犯禁八條相殺以當時償殺相傷以穀償相盜者男沒  
入為其家奴女子為婢欲自贖者人五十萬雖免為民  
俗猶羞之嫁取無所讐言是以其民終不相盜無門戶之  
閉婦人貞信不淫辟其田民飲食以籩豆都邑頗放效  
吏及內郡賈人往往以杯器食郡初取吏於遼東吏見

民無閉藏及賈人往者夜則為盜俗稍益薄今於犯禁  
竊多至六十餘條可貴哉仁賢之化也然東方天性柔  
順異於三方之外故孔子悼道不行設浮於海欲居九  
夷有以也夫樂浪海中有倭人分為百餘國以歲時來  
獻見云自危四度至斗六度謂之析木之次燕之分也

遼東郡

以下附

匈奴傳燕置遼東郡以距之通典云舜營州遼水之東  
是也燕置遼東郡秦漢因之

遼西郡

通典云燕築遼西郡

上谷郡 漁陽郡 右北平郡

天下圖書記云燕築長城又置上谷漁陽右北平遼東以距之

朝鮮障

蘇秦曰燕東有朝鮮遼東按朝鮮傳王滿燕人自始燕時嘗畧屬真番朝鮮為置吏築障秦滅燕屬遼東外徼



# 長城

匈奴傳燕築長城自造陽至襄平置上谷漁陽右北平  
遼西遼東郡以距之冠帶戰國七而三國遘於匈奴燕  
與敵相接杜氏通典云北方以畜牧為業隨逐水草無  
文書俗簡易以言語為約束然各有分地射獵禽獸食  
肉衣皮習於攻戰此天性也唐虞則山戎夏則獯鬻周  
則獫狁懿王時德衰侵暴及涇陽人被其苦至曾孫宣  
王乃命將討伐至太原稱為中興其後山戎越燕伐齊

後又伐燕齊桓公救燕敗走之襄王之時戎狄至雒邑東至衛境侵盜尤甚晉文公乃興師攘却居於西河固洛之間

周音銀

號曰赤翟白翟而晉北有林胡樓煩之戎

燕北有樓蘭山戎各分散谿谷自為君長往往而聚者百有餘戎然不相統一自晉悼公納魏絳之謀和諸戎之服而晉強至安王之時趙襄子踰句注而破之洎於戰國趙武靈王築長城其後燕將秦闕開襲破樓蘭却地千餘里燕亦築長城以距之北邊備對云古來築長

城以扞北虜者四世燕趙秦隋也秦制多仍燕趙而隋氏不盡因秦也



七國攷卷三